

## LIBRU SETTIMU

### *Si torna a navigari*

A navigari si ritorna dopu  
li funerali di l'amata vecchia.  
Lu vinticeddu duci di punenti  
spingi li navi duci duci a mari,  
ca mantinivu la prumissa fatta  
lu diu Nettunu a Veniri ciprigna.  
Supra lu carru risplindenti Apollu  
nto celu incedi, ca lassò lu passu  
la trepidanti Aurora riflittenti  
nta l'azzurratu mari li culuri  
di l'oru e di l'argentu cuntrastanti.  
Attenta ma serena d'Enea la vista  
luntanu l'orizzonti scruta e mira  
l'infinita grannizza di lu mari,  
mentri la menti volgi a lu futuru  
e lu cunfronta cu dda luci bedda  
ca tuttu abbaglia ed azzittisci u munnu.

### *L'isula di Circi*

Ma d'impruvvisu lu silenziu é ruttu  
ca grugniti di porcu, grida e chianti  
senti acchianari nta lu celu chiaru  
dall'isula ca stannu surpassannu.

E' l'isula di Circi la mavara  
ca ci havi lu putiri di scanciari  
in porci l'omini ca vidi e tocca.  
Enea cumincia ad essiri agitatu,  
ma picca sulamenti, ca Nettunu

non si scorda di la prumissa fatta  
ed a Trituni ci cumanna a tappu  
d'ammuttari li navi chiù luntanu.

La paci riturnavu nta lu mari  
ch'era silenti e chinu di spiranzi.

### ***L'approudu 'nto Laziu***

Senza svinturi e senza avvilimenti  
prusegui allegramenti lu camminu  
di l'assurtati navi quannu cessa  
di bottu l'ammuttata di lu ventu.  
Volgi d'attornu l'occhiu scrutaturi  
l'eroi ca capitantu addivintavu  
dopu la morti di lu so nuccheri.  
Davanti vitti 'n-fittu boscu virdi,  
tagghiat' in menzu di nu corsu d'acqua  
ca biondu cuntrastava cu lu virdi  
e ca traseva duci nta lu mari  
e l'acqui cunfunneva di culuri.

Cu sulerti rimata nta ddu lidu  
agghica e sbarca la trujana schera.

Capivu Enea ca la latina terra  
avia davanti, ca l'aceddi 'ntisi  
cantari e svulazzanti fari in celu  
li milli jochi ca 'nsignati foru  
da Veniri a so figghiu tempu arreri.

### ***Situazioni pulitica di lu Laziu***

A chistu puntu di la narrazioni  
cunveni ca si parra tanticchedda  
di chiddu ca successi nta lu Laziu  
prima di la sbarcata di li Teucri,



*Capivu Enea ca la latina terra  
avia davanti ...*

pi sapiri lu comu e lu pirchì  
di guerri già saputi di l'eroi.

Era Latinu, di lu Laziu u regi,  
omu tranquillu e figghiu predilettu  
di lu Saturniu Faunu e di Marice,  
ca nacqui di casatu laurentinu.

Sutta stu regi ch'era saggiu e bonu  
la paci nta stu situ ci rignava,  
tantu ca Marti cca vineva sulu  
pi fari amuri e sessu cu Ciprigna  
mentri Vulcanu a casa travagghiava.

Na figghia sula aveva re Latinu  
pi vuluntati stabilita in celu,  
ca la curuna di lu patri 'n-jornu  
nta testa avissi avutu certamenti.

Lavinia si chiamava sta carusa,  
bedda d'aspettu e signurina ancora.

Pritindenti n'aveva chiù di centu,  
ma chiddu ca pareva chiù sicuru  
d'arrivari a lu talamu cu d'idda  
era lu re de' Rutuli, ca Turnu  
si chiamava ed aveva lu cunsensu  
d'Amata, madri di la picciuttetda.

### *Presagi*

Ma re Latinu nun accunsinteva,  
pirchì prudigi strani nta la reggia  
ci foru tanti e nun si cunvinceva.  
Prima nu sciami d'api s'abbattivu  
in cima all'arvulu d'alloru natu  
nta la citati antica di Laurentu  
e nicu nta la reggia trapiantatu.

Iddi nta nenti ficiru 'n-pupuni,  
cu dintra la rigina, ca crisceva  
e patruni si ficiru di tuttu.  
Dopu a Lavinia li capiddi a focu  
ci pigghiariu e di luci risplindenti  
e riflittenti tutta rilucivu  
e li capiddi dopu ricrisceru  
sempri chiù beddi e culurati d'oru.  
Di Febu lu mavaru interpretavu  
ca s'aspittava l'arrivata nova  
di genti nta lu regnu di Laurentu  
e ca dopu lu focu di la guerra,  
Lavinia sempri chiù splidenti crisci.  
Era Latinu cunfunnutu veru,  
ca tannu nenti si faceva siddu  
nun c'era appruvazioni chiara e certa  
di vuluntà divina e sempiterna.  
Pinsavu allura d'ascutari a Faunu  
so patri supra l'argumentu incertu.  
Cu vittimi prescelti d'agnidduzzi  
nta la furesta Albinia si ni jvu,  
dunn'era ancora vivu lu putiri  
vaticinanti di lu mortu patri.  
A lu Sonnu si detti finu a quannu  
nta l'aria non s'intisi vuci arcana,  
ca dissì chiaramenti: - O figghiu regi  
non fari li spunsali di Lavinia  
cu 'n-omu ch'è latinu, ca lu Fatu  
ad idda distinavu pi maritu,  
nu re stranieru, imparintatu puru  
cu na divinitati, ca granni faci

lu regnu di Laurentu nto futuru. -

Si sparsi tra la genti sta nutizia,  
mentri tuccava terra la cumacca  
di li trujani, ch'eranu stranieri!

### *Li Trujani s'accampantu*

Tirati a siccu li ricurvi navi,  
l'accampamentu subitu appristaru  
nta l'arinusu lidu li trujani,  
ca di robusti palizzati vinni  
cintatu comu na citati nova.

La notti intantu scinni assummurusa  
e supra l'appuntatu artaru Enea,  
sacrificannu chiù di centu agneddi,  
a Giovi chiedi 'n-signu di cunferma  
ch'è chista la prumissa terra avita.  
Nu lampu d'oru squarcia l'orizzonti  
ca s'adduma di luci e di culuri  
e senza malutempu ne chiuvuta.

Capivu Enea lu signu e s'acquetavu.  
L'Aurora tingi cu rusata manu  
lu primu jornu c'agghiurnavu ddocu.

### *Esplorazioni*

L'eroi si leva di matinu prestu  
e guarda attentamenti attornu dunni  
lu jornu prima s'accampavu a casu.

Lu Teviri di certu ci havi a latu,  
ca sfocia nta lu mari e di dda banna  
lu Numicu chiù nicu, ch'è cunfini  
tra Rutuli e Latini. Limitanti  
a la furesta scissa da lu Tebru,

si scorgi di luntanu na citati,  
c'assittata ci pari supra 'n-munti,  
ricca di torri e mura di difisa;  
Laurentu é chista certu la latina.

*Cuntatti cu lu re Latinu  
Richiesta di asilu pulitico*

L'ordini duna Enea di rinfurzari  
lu vallu ca già fici u jornu prima  
e pripa d'araldi na squadriglia  
pi prisintari istanza di rifugiu  
o principi suvranu di Laurentu,  
dicennu dunni sunu e li spiranzi  
ca nta lu cori ci hannu di rizzettu  
e di truvari paci nta ddu locu.

E pi dari cridenza a li paroli  
e nun fari pinsari a li Latini  
d'essiri ritornati a cunquistari  
'n-soccu ad iddi tuccava di dirittu,  
dissi all'araldi di non diri nenti  
di la Dardania discendenza e d'Ilu,  
ca poi li chiarimenti ci sarannu  
a tempu e locu e quannu chiù cunveni  
parrari di st'antica parentela.

Latinu seppi di lu sbarcu intantu  
supra li costi di lu regnu soi,  
ca la Fama currennu ci lu dissì  
e seppi puru c'a parlamentari  
vineva d'iddi na delegazioni.

La reggia para, ch'era tapizzata  
di simulacri e storici figuri,

e nta lu tronu assisu, la ricevi.  
Pi primu pigghia la parola e duna  
lu benvenutu ca già sapi d'iddi  
l'origini luntana e li svinturi.

Voli sapiri chiddu ca po fari,  
si sunu di passaggiu e la tempesta  
li fici dda 'ncappari oppuru siddu  
sbarcaru pi ristari dda pi sempri,  
ca lu Latinu é populu ospitali,  
comu Saturnu primigeniu voli,  
ed iddi sunu ben accetti sempri.

Ilioneu ci arrispunni e dici: - Giovi  
t'ispira o re Latinu, pirchè parri  
e dici 'n-soccu voli u nostru Duci,  
ca cca purtavu li ricurvi navi  
a ripusari in siccu dopu l'atru  
distinu c'affussò la patria nostra.  
Iddu ni manna a dumannari a tua  
paci e rizzettu nta la terra tua  
e d'accittari li prisenti doni,  
ca Veniri pirmisi di sarvari  
da la citati nostra ca mureva.  
Iddu s'aspetta, comu u Fatu voli,  
ca li stissi Pinati nto futuru  
Teucri e Latini aviri ponnu 'nsemi,  
pi grazia tua ca cca cumanni e regni.-

Ascuta assortu re Latinu e pensa  
a chiddu ca ci dissu nta furesta  
Faunu saturniu ed arrispunni tostu:

### ***Prumissa di amicizia e patti***

- Accettu la richiesta e puru i doni.

Speru ca nta sta terra ritruvari  
putiti l'agi e lu tranquillu stari  
di la pirduta patria ca fu granni.  
Li doni rendu cu cavaddi mei  
ed a lu vostru regi, ch'é famusu  
nto Laziu già, ca figghiu n'arrisutta  
di Veniri divina, cunsignati  
la biga ca vi dugnu e li cavaddi  
pi trasiri regali nta citati,  
pirchè la manu di me figghia vogghiu  
ad iddu dari comu si cunveni  
e già prufetizzaru Apollu e Faunu.  
Cuntenti riturnaru nta lu campu  
l'araldi cu nuvella ca lu cori  
di l'eroi llinchi d'esultanti gioia.

### ***Interventu di Giunoni***

Lassamu stari a lu latinu regi,  
cuntentu ca lu chiovu si livavu  
di truvari maritu pi la figghia  
ca Rutulu non fussi di dd'appressu,  
lassamu stari Enea ca gongolava  
pirchè finivu d'essiri minnicu  
ca nautra Didu si truvavu infini,  
ch'é virginedda puru, a quantu pari,  
e nautru regnu ci havi pi dutanza,  
chiù raffermu di dda secunna Tiru,  
lassamu stari li trujani tutti  
cuntenti ca fineru di vagari,  
lassamu stari a Veniri filici  
ca lu so figghiu infini s'accasavu  
e di Giunu parramu immantinenti.

Cu l'ali aperti e cu la vucca a cantru,  
la Fama, curtigliara pi natura,  
a tutti fa sapiri la nuvella  
d'Enea agghicatu nta lu Laziu e già  
si parra di spunsali cu Lavinia.  
Giunoni virdi pi la bili a Giovi  
assegna ddu successu pirchè sapi  
ch'è tenniru di cori e cunsinzent  
quannu la figghia Veniri lu preja  
ed é pi chistu ca si nega appena  
lu sommu patri sconcica la Dea,  
dicennu ca ci vinni lu matruni.  
Giovi capisci a volu di chi pati  
Giunoni so mugheri e non si cura  
di fari paci o di tranquillizzarla.  
Iddu nto munnu scinni nta sti casi  
d'umanu aspettu camuffatu e comu  
diversi voti fici nto passatu,  
vistennusi di toru, gocci d'oru,  
cignu ed autri animali, nta lu lettu  
tumma di cu ci pari e piaci e dopu  
ritorna nta l'olimpu beddu friscu.  
Puru sta vota Giovi si cuncessi  
na piccola licenza... maritali,  
lassannu ca si cocì nto so brodu  
Giunoni ch'è bisbetica mugheri.  
La 'nsetta Giuno sta licenza brutta,  
ma raggia poti chiù ca gilusia  
e cu la testa tra li manu pensa  
chiddu c'ancora fari ci cunsent  
lu Fatu p'arricari detrimentu,

ca sulu chistu poti e nenti chiù.  
Si celu lu pruteggi a chist'Enea,  
videmu si l'infervu é tali e quali,  
    ca Veniri pintuta vogghiu sia  
        d'avirlu parturutu, comu fici  
        cu Paridi la matri tempu arreri!  
    All'antrasatta e senza diri nenti  
    a re Plutoni, nta lu 'nfernus scinni  
        e tra li mostri spavintusi cerca  
    d'Allettu e quannu la truvavu infini  
        cu d'idda la purtavu supra a terra.

### ***Allettu nefasta***

e dissi ferma: - O figghia di la Notti,  
    tu ca mi si suggetta pirchè sugnu  
    di Giovi la mugheri e puru dea,  
        di fora ti niscivu di l'infervu  
            pi dariti l'incaricu sulenni  
        di scinniri nto Laziu, ch'é serenu  
            e nun canusci lu putiri toi,  
            pi sburdiri li pupi comu sai,  
    ca vogghiu ca tra d'iddi li rignanti  
        scerri si fannu ed accussì Bellona  
    lu focu adduma immantinenti ddocu.

Tu libirtati e fama ci guadagni  
ed iu minnitta portu a cumpimentu. -

### ***Interventu d'Allettu***

Allettu, grata a Giuno di purtari  
supra la terra lu vilenu e l'odiu,  
ca chistu sulu ad idda piaci fari,  
nto Laziu curri e misu lu pastranu

ca 'mpidisci all'umani di guardarla,  
nta reggia tumma di Latinu a corpu.

Pigghia di pettu la rigina Amata  
e dalla testa so nu scussuneddu  
ci tira tra li minni discuperti,  
ca muzzica silenti e di vilenu

### *Latinu cuntistatu*

la llinchi tutta para. La mischina  
duna di testa allura ed a lu re  
cuntesta lu trattatu cu li Troi.  
- Ma chi si scemu, dici, ca dunari  
voi nostra figghia a st'omu ca scanusci,

a stu pirata veru ca a Didoni  
l'onuri ci livavu e forsi morta  
apposta vosi la muggheri a Troia?  
Pirchè sta mala parti a Turnu fari?  
Iddu é rignant e vicineddu nostru,  
menzu parenti e grecu pi materna  
stirpi, si propriu nu stranieru voi  
tu dari pi maritu a nostra figghia.-

Latinu la zittivu in malu modu  
ca nta ddi tempi cumannava l'omu  
non sulu nta li reggi ma 'nfamigghia.

### *Ribellioni d'Amata muggheri di Latinu*

Allura Amata d'odiu supirchiata  
da reggia nesci e strati strati curri  
gridannu a cannarozzu chinu e chiaru  
ca re Latinu divintavu pazzu  
ed é zimbella di pirati Troi,  
c'ad arrubari fimmini su' pronti.

Idda a so figghia la pruteggi tostu  
e nta lu boscu dintra si la porta.  
Allettu allura muzzica lu crocchiu  
di fimmini accurruti e na caterva  
di genti si riversa nta lu boscu.  
Cumparunu banneri e scritti osceni,  
ca pari c'arrivavu u sissantottu!  
S'inneggia a Baccu ed abballannu vannu  
comu baccanti nta lu jornu datu  
le laurentine ca di bottu sunu  
perfetti suffraggetti divintati.  
Nun s'accuntenta Allettu ca scurazza  
in lungu e largu nta lu spaziu novu,  
pirchè di Turnu nta la reggia tumma  
e l'aspettu pigghiannu di na vecchia:

***Allettu sobilla Turnu***

- E bravu a Turnu, dici, ca li corna  
troici supporta! Lu cunigghiu Enea,  
ca di Miceni l'armi elusi a Troia,  
scappannu a precipiziu, cca t'arriva  
ed a tia regi d'estrazioni greca  
e zita e regnu futtiri ti voli!

Ma chi ti scurri l'acqua nta li vini  
oppuru fimmineddru arrisuttasti  
ca sulu pi figura in menzu all'anchi  
l'attributi di masculu purtasti? -

Lu Rutilanti regi, ca già sapi  
di re Latinu li maneggi e pensa  
ch'è giustu certu ca lu patri dugna  
la figghia pi mugheri a cu' ci pari,  
d'Allettu muzzicatu e prujncutu,

li corna sentiri si pungi e fremi.  
Non po' Latinu ad iddu svalutari,  
ch'è re putenti, vicinori e pari,  
dannu la figghia e la curuna puru  
ad unu ca scappannu jeva e fama  
minnicu lu vuleva e dumanneri.  
Cu la raggia c'annorba la so menti,  
dopu na notti insonni e turmintata  
guerra dichiara a lu vicinu ziu  
pi la smaccusa scelta e stabilisci  
di rigittari a mari li trujani,  
ma senza navi, c'abbruciari voli!

***Allettu sobilla li viddani***

Allettu dopu nta l'agresti situ,  
unni accampati li Trujani sunu  
si reca risuluta e Julu spingi  
a caccia nta lu boscu dda vicinu,  
unni viveva libiru e filici  
domesticu nu cervu caru a Silvia,  
picciotta schetta nota e rispittata.  
Cu na freccia di Julu nta lu ciancu  
lu cervu torna a la patruna e mori.

La genti muzzicata, pi stu fattu,  
d'Allettu ca fumenta, accetti pigghia  
furcuni ed asti ed assicuta Ascaniu.  
La trumma sona di la guerra in campu  
l'orrenda Allettu e già latini e troi  
di fronti sunu cu li spadi in manu.

Li primi morti, ca latini sunu,  
purtati sunu o re Latinu, mentri  
Giunoni sudisfatta Allettu chiama

e la rimanna muta muta dunni  
vinni, prima ca Giovi la marredda  
sbrogghi, capennu quali fu lu capu.

Allettu nta l'infernū si ni torna  
allirtannu l'Erinni e l'Acheronti  
pirchè la guerra é scatinata ormai.

### *Scoppia la guerra*

Veni ignoratu l'infingardu regi,  
ca stava cunsignannu a ddi bastardi,  
vinuti dallu terzu munnu, l'onuri  
e l'opulenza di lu Laziu anticu.

Lu populu in fermentu lu canceddu  
grapi di Gianu, dichiarannu guerra  
accuminciata nta lu Laziu invasu  
da li pirati turchi e senza terra.

Ausonia tutta s'arrusbigghia ed ardi  
e curri all'armi ch'eranu banditi,  
pirchè da sempri e puru dopu, quannu  
la trumma sona e lu perigliu incalza,  
curri la genti a la difisa pronta.

Osci, Sabini, Fescennini ed Equi,  
Aurunci, Prenestini ed Euretani  
e l'autri genti di li setti colli  
e chiddi Teverini e du Volturnu,  
già sunu pronti a guerreggiari assemi  
contru l'osti nimica ed invasura.

Lu cummannanti in capu di sta genti  
é Turnu regi e dopu c'é Camilla,  
Mezenziu e Lausu ed Ebalu ed ancora  
chiddi ca di poi a Roma divintaru  
capi famigghi illustri, imparintati



*... la trumma sona e lu perigliu incalza,  
curri la genti a la difisa pronta.*

cu st'invasuri di trujana stirpi!  
Viditi chi burdellu vinni fora  
e quali guerra ni nascivu, quannu  
truvare si puteva soluzioni  
accumudanti certu in ogni casu!  
Giunoni fu causanza di sta guerra,  
comu Virgiliu dici e lu susteni,  
ma lu mutivu veru é ca la genti  
di lu luntanu orienti scappa sempri  
ad occidenti, dunni opposizioni  
trova di cu già c'è e nun cunsenti  
inserimenti ed ingerenzi novi.  
Lu re Latinu, ch'era bunacciuni,  
facia parti di chiddi c'accugliaenza  
approvanu cuntenti, inveci Turnu  
di chiddi ca ni sunu riluttanti.